

Páskablað Hjálparstarfs kirkjunnar 2016

Margt smátt ...



Mynd: Paul Jeffrey / Act Alliance

Vegna þurrka í Eþíópíu eru 10 milljónir manns á barmi hungursneyðar:

Bregðumst við NÚNA!

Valgreiðsla í heimabanka

Söfnunarsími 907 2003 (2.500 krónur)

Söfnunarreikningur 0334-26-886

kt. 450670-0499



Hjálparstarf
kirkjunnar

actalliance

Vissir þú?

- að 10 milljónir íbúa Eþíópíu eru á barmi hungursneyðar?
- að þar af eru 6 milljónir börn?
- að 80% Eþíópía lifa á landbúnaði og treysta á úrkomu tvisvar á ári, minni regntíminn (belg) er í mars til apríl og stærri (kerimt) í ágúst til október?
- að í fyrra (2015) brást fyrri úrkoma ársins nánast alls staðar og sú seinni kom fyrr en vanalega og varði mjög stutt og mjög víða rigndi ekkert?
- að úrkomuleysið er talið afleiðing af hlýnun jarðar og eru svokölluð El Nino áhrif?
- að stjórnvöld í Eþíópíu hafa notað meira en tvö hundruð miljónir Bandaríkjadala til að reyna að tryggja fæðuöryggi og eru betur undirbúin en oft áður, en ráða ekki lengur við vandann ein?
- að þrátt fyrir erfitt ástand í Eþíópíu hafa Eþíópar tekið á móti um 700.000 flóttamönnum frá nágrannaríkjum, flestum frá Suður-Súdan?

Ef þú vissir þetta ekki fyrir, þá veistu það núna! Og þá kemur næsta spurning: Viltu vera með í að gera eitt-hvað til að bregðast við þessu ástandi?

Hjálparstarf kirkjunnar er með verkefni í Jijiga í Austur-Eþíópíu sem nær til meira en 34.700 manns þar sem fæðuöryggi er eitt af meginmarkmiðunum. Hjálparstarfið er aðili að Alþjóðlegu hjálparstarfi kirkna, ACT Alliance sem þegar hefur hafið neyðaraðstoð á verst settu þurrkasvæðunum. Markmiðið er að bjarga mannlífum, tryggja lágmarksheilsugæslu og næringu fyrir börn sem eru vannærð, tryggja aðgang að hreinu drykkjarvatni, bjarga búfé og auka framleiðni í búfjárrækt og landbúnaði.

Nauðsynlegt er að bregðast við núna. Getur þú verið með? Þú getur greitt valgreiðslu í heimabanka (2.400 krónur), hringt í söfnunarsíma 907 2003 (2.500 krónur) eða lagt inn á reikning: 0334-26- 886, kt. 450670-0499. Starfið er hafið en nær lengra ef þú ert með. Eþíópískt spakmæli segir eitthvað á þessa leið: „Þegar kóngulóarvefir sameinast geta þeir haldið aftur af ljóni.“ Láttu ekki þinn þráð vanta í björgunarnetið, það veikir netið.

Takk fyrir þitt framlag!



Bjarni Gíslason, framkvæmdastjóri Hjálparstarfs kirkjunnar




Hjálparstarf kirkjunnar

Framkvæmdastjóri: Bjarni Gíslason
Margt smátt, 1. tbl. 28. árgangur 2016
Ábyrgðarmaður: Kristín Ólafsdóttir
Prentvinnsla:
Umbrot: PIPAR\TBWA
Prentun: Ísafoldarprentsmiðja

- Langstærsta verkefni Hjálparstarfsins í pró-unarsamvinnu erlendis er á þurrkasvæðum í Eþíópíu en þar eru vatnsþræ grafnar, brunnar byggðir og fræðsla veitt um nýtingu vatns, bættar ræktunaraðferðir, hreinlæti og smitleiðir sjúkdóma. Stuðlað er að bættum hag kvenna með því að veita þeim fræðslu og þjálfun í atvinnurekstri og örlán til að hrinda viðskipta-hugmyndum í framkvæmd.
- Alls nutu 1.453 fjölskyldur (um 3.900 manns) um land allt aðstoðar fyrir síðustu jól eða tveim fjölskyldum færri en fyrir jól 2014. Af umsækjendum voru 81% konur, 55% einstæðir foreldrar, 44% á örorkubótum, 16% voru á framfærslu sveitarfélaga og 15% voru í vinnu. Í desember og janúar síðastliðnum fengu 584 einstaklingar til viðbótar notaðan fatnað hjá Hjálparstarfinu og stuðning vegna lyfjakaupa.
- Á Íslandi aðstoðar Hjálparstarf kirkjunnar efnalitla með inneignarkortum í matvöruverslanir samfara félags- og fjármálaráðgjöf. Stuðningur er veittur vegna óvænts lyfjakostnaðar og þá njóta börn og unglingar stuðnings í upphafi skólaárs og til að stunda tónlistarnám, íþróttir og tómstundastarf. Sjálfstyrkingar- og færni-námskeið eru einnig í boði ásamt skipulagðri samveru sem vinnur gegn félagslegri einangrun sökum fátæktar.
- Neyðaraðstoð vegna stríðsátaka og núttúruhamfara er veitt í samvinnu við systursamtök í Alþjóðlegu hjálparstarfi kirkna, ACT Alliance, Lútherska heimssambandið og heimafólk á vettvangi.

ÞÖKKUM STUÐNINGINN




Verstu þurrkar í Eþíópíu í þrjátíu ár - Söfnun vegna neyðaraðstoðar er hafin!

Hjálparstarf kirkjunnar hefur hafið fjársöfnun til að svara neyðarbeiðni Alþjóðlegs hjálparstarfs kirkna, ACT Alliance, vegna langvarandi þurrka í Eþíópíu. Samkvæmt skrifstofu Sameinuðu þjóðanna í mannúðarmálum (OCHA) eru yfir tíu milljónir manns, þar af nær sex milljónir barna, í brýnni þörf fyrir aðstoð. Stjórnvöld í landinu telja að 400 þúsund börn séu alvarlega vannærð og önnur 1,7 milljónir barna fá ekki næga næringu.

Neyðarástandið sem nú blasir við má rekja til þess að lítið sem ekkert hefur rignt í norðanverðu landinu í að verða átta mánuði þannig að haustuppskera brást, yfir 400 þúsund dýr drápu úr þorsta, 800 þúsund íbúa misstu lífsviðurværi sitt og fóru á vergang og 5,8 milljónir íbúa skortir aðgang að hreinu vatni. Stjórnvöld í Eþíópíu brugðust skjótt við en útilokað er að þau ráði hjálparlaust við það neyðarástand sem nú blasir við.

Alþjóðlegt hjálparstarf kirkna, ACT Alliance, hefur sent út neyðarbeiðni fyrir um 5 milljónum Bandaríkjadala til að bæta fæðuöryggi, veita húsaskjól, tryggja heislugæslu og skólagöngu barna og til að útvega sjálfsþurftarbændum á verstu þurrkasvæðunum útsæði fyrir næsta regntímabil, búfænað og bóluefni fyrir dýrin.



Lútherska heimssambandið (LWF) í Eþíópíu aðstoðar íbúa í Lalibela í Amharafylki. Uppspera þar var mjög léleg síðasta haust sem leiddi til þess að bændur þurftu að selja búfé til að eiga fyrir mat. Í Jijiga- og Tulugulade-héruðum í Sómali-fylki vinnur Hjálparstarfið á 8 svæðum (kebele) með 34.710 sjálfsþurftarbændum og hálfhirðingjum.

Þörfin er brýn

- 10,2 milljón manns þurfa mataraðstoð
- 2 milljónir bænda þurfa búfænað og útsæði
- 1,3 milljónir barna komast ekki í skóla
- 800 þúsund íbúa vantar húsaskjól og búsáhöld
- 2,1 milljón barna búa við næringarskort og þurfa viðbótarnæringu
- 3,6 milljónir íbúa skortir heilsugæslu
- 2,5 milljónir íbúa búa við óöryggi og eiga á hættu að vera misnotaðir
- 5,8 milljónir íbúa skortir aðgang að hreinu vatni og hreinlætisaðstöðu

Skv. upplýsingum frá stjórnvöldum í Eþíópíu, (HRD 2016)



Þurrkar og uppskerubrestur í Eþíópíu eru raktir til loftslagsbreytinga



Paul Jeffrey / Act Alliance

„Ég fagna því að náðst hefur sögulegt og metnaðarfullt samkomulag í loftslagsmálum og við munum leggja okkar af mörkum bæði hér heima og við að miðla þekkingu okkar og reynslu til annarra þjóða“, sagði Sigmundur Davíð Gunnlaugsson, forsætisráðherra þegar nýtt samkomulag í loftslagsmálum náðist í París þann 12. desember síðastliðinn. Í samkomulaginu er meðal annars viðurkennt að bregðast þurfi við skaða sem fátæk ríki verða fyrir vegna neikvæðra áhrifa loftslagsbreytinga, bæði við að draga úr líkum á skaða og bregðast við tjóni sem verður. Samkomulagið verður formlega undirritað nú apríl en tekur gildi árið 2020. Það er hins vegar allt of seint fyrir

sjálfsþurftarbændur í Eþíópíu sem þurfa nú þegar að kljást við afleiðingar hlýnunar jarðar.

Veðurkerfið El Nino eykur hlýindi í mið- og suðurhluta Kyrrahafsins. Talið er að El Nino hafi sótt í sig veðrið árið 2015 af völdum loftslagsbreytinga en þegar kerfið fer úr böndunum veldur það þurrkum í Afríku, meðal annars í Eþíópíu. Þurrkarnir valda uppskerubresti og dýr falla úr hor og vatnsskort. Sjálfsþurftarbændur flosna upp frá jörðum sínum, missa fæðuöryggi og fara á vergang. Börn líða næringarskort og njóta hvorki skólavistar né heilsugæslu. Fólk á vergangi er auk þess útsett fyrir misnotkun.

Grafalvarlegt ástand

Síðan hungursneyð olli dauða fleiri en milljón Eþíópa árin 1984-1985 hafa stjórnvöld í landinu bætt neyðarvarnir og viðbúnað umtalsvert. Þau brugðust við versnandi ástandi árið 2015 og vörðu 381 milljón Bandaríkjadala til útvega sjálfsþurftarbændum næringarríkan mat, vatn og dýrafóður. Nú þegar þurrkar hafa varað í marga mánuði og óvíst hvort rigni á regntíma í mars og apríl er hins vegar svo komið að stjórnvöld ráða ekki við ástandið án utanaðkomandi aðstoðar. Þau hafa nú beðið alþjóðasamfélagið um hjálp.

„Ástandið er grafalvarlegt og það sem meira er að þá bendir allt til þess að ekki rigni á regntímanum nú í vor heldur,“

segir Sophia Gebreyes, yfirmaður hjálparstarfs Lútherska heimssambandsins (LWF) í Eþíópíu sem aðstoðar um 57 þúsund íbúa í Lalibela í Amharafylki. Uppskera þar var mjög léleg síðasta haust sem leiddi til þess að bændur þurftu að selja búfé til að eiga fyrir mat.

Lútherska heimssambandið aðstoðar bændurna með því að útvega þeim þurrkþolið útsæði og dráttardýr svo hægt sé að plægja jörðina og sá í hana þegar rignir á ný. Þangað til uppskera kemur í hús greiðir LWF fólki laun fyrir vinnuframlag svo það geti keypt sér mat og helstu nauðsynjar. Nánar um neyðaraðstoð LWF í Eþíópíu er að finna á vefslóðinni <https://www.lutheranworld.org/news/10-million-ethiopians-need-emergency-aid>.



„Þetta er lélegasta uppskera sem ég man eftir,“ segir Woday Gelaye, 75 ára bóndi sem hefur búð í Lalibela í 60 ár. Hanna Mornement / LWF



Woday Gelaye sýnir lélega uppskeru á kjúklingabaunum. Hann þarf nú að reiða sig á aðstoð hjálpar samtaka um mat. Hanna Mornement / LWF



Plógur sem ristir djúpt eykur uppskeruna

Samvinnuverkefni með sjálfsþurftarbændum

- Trjágræðingar eru ræktaðir og gróðursettir til að binda vatn í jarðveg og mynda seinna skugga fyrir aðra ræktun
- Fræðsla er veitt um hvernig best er að undirbúa jarðveg fyrir ræktun, um kosti áveitu og ágæti taðs sem áburðar
- Nýjar tegundir eru kynntar til jarðræktar og fræðsla veitt um kosti víxlræktunar fjölbreyttra og þurrkaþolinna fæðutegunda
- Fræðsla er veitt um hvernig auka má geymsluþol uppskerunnar
- Bændur fá plóga og skóflur til að auðvelda jarðyrkju
- Sparhlóðir sem minnka eldiviðarþörf og draga úr reykmenngun eru innleiddar
- Dýraliðar eru þjálfaðir í að bólu-setja dýr
- Fræðsla er veitt um meðferð við dýrasjúkdómum
- Fræðsla er veitt um afleiðingu ofbeitar

Hjálp til sjálfshjálpar í Jijiga og Tulugulade

Hjálparstarf kirkjunnar hefur stutt sjálfsþurftarbændur í Sómalí-fylki í Eþíópíu síðan árið 2007. Fylkið er eitt af fjórum fátækustu fylkjum í landinu. Það þekur 144 þúsund ferkílómetra og þar búa yfir 5 milljónir sjálfsþurftarbænda og hálfhirðingja. Grunnstoðir samfélagsins eru veikar og fjarskipti og samgöngur eru léleg. Tíðir þurrkar valda viðvarandi matarskortum og vannæringu í fylkinu og um ein milljón íbúa er háð mataraðstoð að staðaldri. Búfjárrækt með kameldýr, kindur, geitur og nautgripi er undirstöðuáttvinnugrein en þar sem skilyrði eru til er einnig ræktað maís, hirsir, hveiti, bygg og khat. Vatnsskortur á svæðinu hefur leitt til lélegs ástands bústofnsins en dýralæknáþjónusta er stopul. Skortur er á tækjum og tólum og því eru ræktunaraðferðir í jarðrækt takmarkaðar. Allt leiðir þetta til þess að fæðuöryggi er mjög lítið og lífsskilyrði slæm. Í Jijiga- og Tulugulade-héruðum í Sómalífylki vinnur Hjálparstarfið á 8 svæðum (kebele) með 34.710 sjálfsþurftarbændum og hálfhirðingjum. Starfið á svæðinu hófst í nóvember

2007 en áætlað er að yfirstandandi verkefni ljúki árið 2017.

Plógur

Búfjárrækt er undirstöðuáttvinnugrein en þar sem skilyrði eru til er einnig ræktað maís, hirsir, hveiti og bygg. Fólkið skortir hins vegar tæki og tól til ræktunar. Meðal annars með því að útvega þeim plóg sem ristir djúpt er hægt að bæta uppskeruna umtalsvert.

Kornþreskivél

Þreskivél sem losar korn úr öxunum og hreinsar það frá hálminum sparar tíma sem hægt er að nota til að mala kornið, baka brauð og búa til grauta. Með tryggara aðgengi að hreinu vatni, endurbættum frætegundum og skilvirkari ræktunaraðferðum verður auðveldara að rækta maís, hirsir, hveiti og bygg þar sem skilyrði eru slæm.

Bóluefni

Búfjárrækt með kameldýr, kindur, geitur og nautgripi er undirstöðuáttvinnugrein í Sómalí-fylki þar sem tíðir þurrkar valda

matarskortum og vannæringu. Vatnsskortur hefur leitt til lélegs ástands bústofnsins en dýralæknáþjónusta hefur verið af skornum skammti. Hjálparstarfið aðstoðar sjálfsþurftarbændur á

svæðinu með því að útvega bóluefni, lyf og áhöld. Dýrasjúkraliðar eru þjálfaðir í að bólu-setja og meðhöndla dýr og þjónustan er færð nær fólkinu. Þar með eykst framleiðslan og fæðuöryggi íbúanna.



Kornþreskivél sparar tíma og nýtir uppskeruna betur



Bólusetning bætir heilsu bústofnsins



KOMDU Í FÓTBOLTA



Eftir helgina höfðu foreldrar unglunganna samband við félagsráðgjafa Hjálparstarfsins og lýstu ánægju þeirra með fríið. „Hún talar endalaust um hvað það var gaman. Takk innilega fyrir stelpuna mína!“ „Takk kærlega fyrir drenginn. Hann er súper ánægður og langar aftur!“ voru meðal skilaboða.

Unglingafjör á Úlfljótsvatni

Í vetrarfríi grunnskóla í Reykjavík, helgina 26.–28. febrúar, fóru fimmtán ungmenni á aldrinum 11–15 ára á Úlfljótsvatn á vegum Hjálparstarfs kirkjunnar og Hjálpræðishersins í Reykjavík. Markmið ferðarinnar var að eiga skemmtilegt og viðburðarríkt vetrarfrí í fallegu umhverfi. Skátarnir héldu uppi frábærri dagskrá eins og þeim einum er lagið. Krakkarnir fengu að spreyta sig á klifurturninum og að skjóta úr boga. Þau lærðu að búa til bálköst og grilluðu sér sykurpúða, poppuðu og bökuðu brauð yfir eldinum. Á dagskrá var líka sleðafjör, íþróttaleikar og kvöldvökur. Veðrið lék við okkur sem var eins gott þar sem við vorum að mestu leyti utanhúss. Krakkarnir stóðu sig frábærlega vel en í ferðinni þurftu allir að stíga aðeins út fyrir þægindahringinn sem okkur er svo hollt. Sumir voru að fara einir að heiman í fyrsta sinn og aðrir fóru í ferðina án þess að þekkja nokkurn. Hópurinn var fljótur að kynast innbyrðis og voru það glöð og sátt börn sem snéru heim til foreldra sinna eftir helgina.



„Það er okkur alltaf hollt að staldra við og líta inn á við og það er sérstaklega gott að gera það í góðra kvenna hópi,“ segir Sædís Arnardóttir, félagsráðgjafi Hjálparstarfs kirkjunnar. Í bakgrunni má sjá verkefni sem unnið var á sjálfstyrkingarnámskeiðinu.

Konur eru konum bestar

Konur eru konum bestar er sjálfstyrkingarnámskeið sem prestar og djáknar Þjóðkirkjunnar hafa haldið víðsvegar um landið mörg undanfarin ár. Markmið námskeiðsins er að skapa konum vettvang til að kynnast sjálfum sér betur í góðum félagsskap þar sem þær fá tækifæri til að deila reynslu sinni og benda hver annarri á

leiðir til að styrkja sjálfsmyndina en rík áhersla er lögð á virka þátttöku í hópaverkefnum og umræðum. Hjálparstarfið hefur fengið sr. Petrínu Mjöll Jóhannesdóttur til að vera með nokkur námskeið fyrir hópa og gjarnan er námskeiðið notað sem hluti af stærra og víðameira verkefni. Í nóvember 2015 fór Sædís

Arnardóttir, félagsráðgjafi hjá Hjálparstarfinu, á leiðbeinendanámskeið hjá Petrínu Mjöll og í febrúar fór hún af stað með sitt fyrsta námskeið fyrir 11 konur. Námskeiðið er enn í gangi og hafa þátttakendur lýst yfir mikilli ánægju með sjálfsvinnu sem þær fer fram.

Fermingargjöf sem gefur

Fermingarskeyti eða gjafabréf frá Hjálparstarfi kirkjunnar er gjöf sem heldur áfram að gefa. Fermingarbarnið fær skeytið eða bréfið í hendurnar en andvirðið rennur til jafnaldra fermingarbarnsins sem býr við fátækt.

Sendu skeyti, það kostar 1.990 kr. Eða gefðu fermingargjafabréf að upphæð 5.000 kr.

Þú færð skeytin og gjafabréfin á www.gjofsemgefur.is eða pantar þau á skrifstofunni okkar, 528 4400. Þú prentar út, sækir til okkar – eða við sendum fyrir þig. Einfalt og gleðilegt.



Óskalistinn minn:

Rúm
Myndavél
Svefnpoki
iPod
Vefmyndavél
Teppi
Orðabók
Hálsmen
Svo væri gaman að fá pening og „Gjöf sem gefur“.
Mig langar til að einhver sem er ekki eins heppinn og ég fái að njóta með mér.



Óskalistinn minn:

Við systkinin erum munaðarlaus. 1.990 kr. fermingarskeyti á Íslandi dugar fyrir 3 hænum. Þær gefa okkur fullt af eggjum.

5.000 kr. gjafabréf á Íslandi myndi gefa okkur geit. Eða kannski reiðhjól. Þá kæmist ég á markað með uppskeruna okkar og við fengjum pening.



Það er alltaf jafn gaman að elda og borða í góðum félagsskap enda voru þátttakendur jafnt sem leiðbeinendur virkilega ánægðir með matreiðslunámskeiðið. Hjálparstarfið kann Góða hirðinum, nytjamarkaði Sorpu, bestu þakkir fyrir stuðninginn við verkefnið!

Matreitt í heilsueflandi samveru

Í október 2015 fór Hjálparstarfið og Hjálpræðisherinn af stað með námskeiðið Heilsueflandi samvera. Námskeiðið sem stendur fram í apríl er ætlað konum utan vinnumarkaðar en markmiðið með því er að efla andlega, líkamlega og félagslega heilsu þátttakendanna.

Einn hluti af námskeiðinu var matreiðsla í matreiðslustofunni í Réttarholtsskóla en Gunnþórunn Jónsdóttir matreiðslukennari tók hópinn að sér í fjögur skipti. Undir hennar leiðsögn voru galdræðir fram hinir ýmsu réttir og má þar nefna japanskt kjúklingsalat,

Chili con carne, kanelsnúða og pönnukökur. Í hverjum tíma voru matreiddir 2–3 aðalréttir auk eftirrættar og endaði tím-inn á sameiginlegu borðhaldi þar sem konurnar gæddu sér á veislumatnum saman.



Bjarni Karlsson, siðfræðingur og prestur á sálfræðistofunni Haf, og Laufey Ólafsdóttir, nemi og samhæfingarstjóri Pepp á Íslandi, segja komu flóttafólks veita okkur tækifæri til að skapa alvöru þátttökumeningu á Íslandi.

„Við verðum að rækta með okkur mennskuna“

„Flóttafólk og aðrir útlendingar koma með nýja menningu inn í landið og það er áskorun. Kannski verður hún til þess að við finnum leiðir til að skapa alvöru þátttökumeningu og hugarfar þar sem við búumst við og gerum ráð hvert fyrir öðru og þar sem við skiljum engan eftir. Að vilja lifa í fjölmenningu þýðir að vilja deila kjörum með öðrum. Við Íslendingar höfum hins vegar ekki gert upp við okkur hvort við viljum í alvöru taka á móti nýju fólki. Annað hvort nennum við að lifa í fjölmenningu eða ekki og ef við nennum því ekki getum við bara byrjað á því strax að reisa girðingar og gettó,“ segir Bjarni Karlsson, siðfræðingur og prestur, en hann og Laufey Ólafsdóttir, háskólanemi og samhæfingarstjóri PEP (People Experiencing Poverty) á Íslandi voru meðal þeirra sem héldu erindi á ráðstefnu um notendasamráð í þjónustu við fátæka sem haldin var í Reykjavík í janúar síðastliðnum. Bjarni ræddi þar um staðalmyndir sem ýta undir og viðhalda viðteknum hugmyndum um vald og valdaleysi fólks en Laufey ræddi um þátt fjölmiðla í að móta viðhorf til þeirra sem búa við fátækt.

Viltu segja mér sögu þína?

Bjarna og Laufeyju er mjög umhugað um að bæta hag og efla réttindi minnihlutahópa, sérstaklega þeirra sem búa við fátækt og félagslega einangrun. Þau segja útlendinga og fátæka á Íslandi eiga það sameiginlegt að samfélagið verði að gera ráð fyrir þeim og skapa sameiginlegt rými þar sem allir geti tekið þátt í daglegu lífi í lýðræðissamfélagi. „Það er vesen að tilheyra samfélagi en við eigum ekki val um annað. Örlög okkar

jarðarbúa eru samofin og það er heimska að halda að við komumst upp með að taka ekki tillit hvert til annars. Í samfélagi sem er þess virði að búa í verðum við að vilja hlusta og spyrja „viltu segja mér sögu þína?“ og „hvernig gerir þú?“ segir Bjarni.

Fátækt er alltaf útilokandi


„Þegar við tölum um félagslega einangrun er valfrelsi lykilatriði. Listamaður sem fer í sjálfskipaða einangrun til að hafa frið til að skapa hefur val en sá sem ekki getur tekið þátt í daglegu lífi sökum fátæktar hefur ekkert val og býr þess vegna við félagslega útilokun sem er móðgun við mennskuna,“ segir Bjarni og bætir við að á Íslandi sé félagsleg auðmýking vegna fátæktar enn meira stingandi vegna þess að samfélagið sé með þeim allra ríkustu í heimi og fátækir hlutfallslega fáir ef miðað sé við önnur ríki í Evrópu. „Fátæktin hér er svo óþörf og þess vegna er hún enn sársaukafyllri.“

Laufey tekur undir með Bjarna og bætir við að aðalatriðið sé að öllum verði gert kleift að sinna grunnþörfum sínum með grunnframfærslu, hvaðan sem hún komi, að það séu hrein og klár mannréttindi. „Við verðum að finna viðunandi lágmarksframfærsluviðmið um leið og við gerum ákveðnar kröfur um þátttöku fólks á raunhæfum forsendum. Núna er fólki refsað fyrir að vera virkt með því að bætur þess eru skertar og það þarf að laga. Við þurfum að umbuna fyrir virkni í stað þess að refsa. Talandi um það hvernig við gætum bætt samfélagið þá væri mjög gott að byrja á því að hætta að búa til reitt fólk. Fólk verður

langþreytt á stöðugu mótlæti og erfiðleikum og það veldur reiði, sem er mjög skiljanlegt.“

„Já, við þurfum að viðurkenna félagslega og tilfinningalega þáttinn í þessu. Fátækt felur alltaf í sér félagslega úti-

lokun og þátttökuleysi sem enginn óskar sér. Við þurfum að finna leiðir og vera útsjónarsöm við að skapa menningu í landinu þar sem við reiknum hvert með öðru og eflum þátttöku allra, segir Bjarni.



Í Farsæld, skýrslu Hjálparstarfs kirkjunnar og Rauða krossins í Reykjavík um málefni fátækra á Íslandi frá 2012 er lagt til að hinn óskráði samfélagsáttmáli feli í sér að stuðningur samfélagsins verði ekki í formi ölmusu heldur stuðli að mannlegri reisn með kröfu um ábyrgð hvers einstaklings um leið og samfélagið tryggir honum tækifæri til þátttöku. Bent er á fátæktargildrur í samfélaginu og tillögur að lausnum eru settar fram í 16 liðum. Skýrslan er aðgengileg á vefsíðu hjálparstarfs kirkjunnar www.help.is

Breytendur eru meðmælendur

Breytendur á Adrenalíni er angí af Breytöndum – Changemaker á Íslandi sem hafa það að markmiði að gera heiminn að betri stað. Við erum virkir þátttakendur í því sameiginlega átaki. Í starfinu kynnumst við heiminum nær og fjær, sækjum okkur þekkingu og lærum hvert af öðru. Enginn getur gert allt, en allir geta gert eitthvað. Þess vegna höfum við staðið fyrir ýmiskonar viðburðum og reynum að fá fólkið í kringum okkur til að taka þátt í þeim með okkur. Meðal viðburða eru meðmælagöngur. Okkur finnst það nefnilega kærkomin tilbreyting í okkar samfélagi að ganga með en ekki á móti. Við veljum okkur þá málefni til að leggja aðaláherslu á í göngunni og mælum síðan með því með skiltum og söng. 6. mars sl. héldum við meðmælagöngu fyrir trúfrelsi. Þar lögðum við áherslu á rétt fólks til að velja og finna sér farveg í friði og án þess að vera beitt ofbeldi. Hér á jörðu er nóg rými fyrir alla og það er hollt að rækta forvitni og virðingu fyrir flóru lífsins. Það má því segja að við setjum kraft okkar í að starfa í jákvæðni og að vera uppbyggjandi. Breytendur á Adrenalíni hittast alla sunnudaga milli kl. 17.00 til 18.30 og er öllum 14 ára og eldri velkomid að vera með í starfinu.

Hjalti Jón Sverrisson, umsjónarmaður æskulýðsstarfs og Garðar Ingvarsson, Breytönd á Adrenalíni.



Breytendur á Adrenalíni skipulögðu meðmælagöngu fyrir trúfrelsi þann 6. mars síðastliðinn.

Kærar þakkir fyrir stuðninginn!

Hjálparstarfið hefur notið góðra styrkja frá einstaklingum, félögum, fyrirtækjum og stofnunum til verkefna innanlands og utan. Nú í janúar styrkti Hallgrímssókn Hjálparstarfið með 3,3 milljóna króna framlagi en Hallgrímssókn var frumkvöðull að því að hafa samskot í messum þar sem fólk getur lagt fram fé til brýnna málefna en fé er einnig safnað með ljósberanum í kirkjunni þar sem m.a. margir ferðamenn gefa gjafir.

Á myndinni sem var tekin við þetta tækifæri eru sr. Jón Dalbú Hróbjartsson, Að-

alheiður Valgeirsdóttir, varaformaður sóknarnefndar, Kristín Bjarnadóttir, fulltrúi Kristniboðssambandsins, Bjarni Gíslason, framkvæmdastjóri Hjálparstarfs kirkjunnar og sr. Sigurður Árni Þórðarson.



Hallgrímssókn styrkti Hjálparstarfið með 3,3 milljóna króna framlagi.



Héraðsskólinn er opin allan ársins hring. Hjá okkur kemstu í veitingar og gistingu á góðu verði. Við sjáum um ráðstefnur, vinnufundi og veislur í skemmtilegu umhverfi gamla skólans á Laugarvatni. Verið ávallt velkomin

Ást og friður



Í Líbanon er nú um 1,5 milljónir flóttamanna frá Sýrlandi. Þrátt fyrir það hafa stjórnvöld í landinu ekki leyft hjálparsamtökum að reisa flóttamannabúðir. Flóttafólk hópast því saman í fátækrahverfum við landamærin. Hjálparstarf kirkjunnar veitir fólki þar margvíslega aðstoð, meðal annars með því að sjá fólkinu fyrir heitri og næringarríkri máltíð einu sinni á dag.
Paul Jeffrey / ACT Alliance

Neyðaraðstoð við flóttafólk frá Sýrlandi

Hjálparstarf kirkjunnar sendi nú í febrúar 22,6 milljónir króna til neyðaraðstoðar við stríðshrjáða Sýrlendinga sem hafa flúið heimili sín og eru heimilislausir, hjá venslafólki eða í flóttamannabúðum í Sýrlandi, Jórdaníu og Líbanon. Á árinu 2016 áætla samstarfsaðili Hjálparstarfsins á vettvangi, International Orthodox Christian Charities (IOCC), að aðstoða um 60 þúsund manns með því að tryggja þeim

aðgang að heilsugæslu og útvega fæði, skjól og húsbúnað ásamt því að gera börnum kleift að sækja skóla og veita flóttafólkinu sálrænan stuðning. Þá er móttökusamfélögum hjálpað svo þau geti sem best tekið á móti sífellt fleira flóttafólki. Utanríkisráðuneytið styrkir verkefnið um tuttugu milljónir króna. Í febrúar 2014 sendi Hjálparstarfið 16,6 milljónir króna til neyðaraðstoðar við stríðshrjáða Sýrlendinga og nemur

því heildarframlag til þessa brýna mannúðarstarfs 39,2 milljónum króna. Talið er að fleiri en 200.000 manns hafi látið lífið í borgarastyrjöldinni sem hófst í Sýrlandi árið 2011. Af þeim tuttugu milljónum sem bjuggu í landinu áður en átökin hófust eru nú yfir tólf milljónir á flótta. Átta milljónir eru á vergangi í heimalandinu, fjórar milljónir hafa flúið land, langflestir til nágrennalanda. Tæp hálf milljón Sýr-

lendinga hafa hafa sótt um hæli í Evrópu. Hjálparstarf kirkjunnar í Grikklandi, Ungverjalandi og Serbíu veita flóttafólki frá Sýrlandi, Afganistan, Eritreu, Írak og Sómalíu neyðaraðstoð og sálrænan stuðning. Örmagna flóttafólkinu eru veitt matarföng, húsaskjól, eldhúsahöld, aðgangur að hreinlætisaðstöðu og hreinlætisvörur auk þess sem leitast er við að veita því sálrænan stuðning, fræðslu og ráðgjöf.

Stuðningur við enduruppbyggingu í Nepal

Í Nepal aðstoðar Alþjóðlegt hjálparstarf kirkna, ACT Alliance, 308 þúsund íbúum sem urðu illa úti í jarðskjálftanum í apríl í fyrra með því að tryggja þeim hreint vatn og hreinlætisaðstöðu, heilbrigðisþjónustu, húsaskjól og stuðning við viðgerð á húsnæði, matarföng, áfallahjálp og sálrænan stuðning. Hjálparstarf kirkjunnar sendi nú í febrúar 21 milljón króna, verkefna sem DCA, dönsk systursamtök Hjálparstarfsins, stýra og lýkur þeim í apríl 2016. Utanríkisráðuneytið styrkti verkefnið um tuttugu milljónir króna.

Alþjóðlegt hjálparstarf kirkna, ACT Alliance, hefur síðan í fyrravor aðstoðað fórnarlömb jarðskjálftans í Nepal með

því að tryggja hreint vatn og hreinlætisaðstöðu, heilbrigðisþjónustu, bráðabirgðaskýli, matarföng, áfallahjálp og sálrænan stuðning. Lúterska heimssambandið (LWF), Lúterska hjálparstarfið í Bandaríkjunum (LWR), finnska hjálparstarfið (NCA) og danska hjálparstarfið (DCA) framkvæma neyðaraðstöðina í samstarfi við innlend samtök sem eru aðilar að ACT Alliance. Jarðskjálftinn sem reið yfir þann 25. apríl síðastliðinn var upp á 7.3 stig á Richter. Upptökin voru 80 km norðvestur af höfuðborginni Kathmandu. Talið er að rúmlega 7000 manns hafa látist í kjölfar skjálftans og eyðileggingin á innviðum var gifurleg.



Kabita Shrestha missti allt sitt þegar húsið hennar hrundi í jarðskjálftanum í apríl í fyrra. Hún fékk stuðning frá Hjálparstarfi kirkna til að koma þaki yfir fjölskyldu sína á ný. Hún og aðrar konur í þorpinu hennar bjuggu til múrsteinana úr leir og bökðu við eld og tóku svo þátt í að hlaða ný húsakynni.

Við erum stolt af unga fólkinu okkar!

Ungt fólk á Austurlandi er duglegt að taka þátt í því starfi sem Æskulýðssamband kirkjunnar á Austurlandi, ÆSKA, stendur fyrir, ýmist á eigin vegum eða í samstarfi við aðra. Undanfarnin ár hefur stór hópur austfirskra unglunga tekið þátt í Landsmóti ÆSKA og hefur ÆSKA greitt þann kostnað sem fylgir því að fara með stóran hóp á mót. Í fjáröflunarskygni, bæði fyrir þátttakendur og til að standa undir kostnaði hefur ÆSKA staðið fyrir happdrætti. Fyrirtæki á Austurlandi hafa verið jákvæð gagnvart verkefninu og gefið veglega vinnu og kunnum við þeim bestu þakkir fyrir.

Frá upphafi hefur Happdrætti ÆSKA styrkt Hjálparstarf kirkjunnar og tekið þátt í þeirra söfnun sem ÆSKA og Hjálparstarfið hafa komið sér saman um hverju sinni enda hefur það



Ungt fólk í kirkjustarfi á Austurlandi safnaði 250 þúsund krónum með sölu happdrættismiða. Afraksturinn fer í að auðvelda börnum sem búa við kröpp kjör að stunda íþróttir og tómstundastarf.

mikið uppeldislegt gildi fyrir ungt fólk í kirkjustarfi að taka þátt í hjálparstarfi.

Í ár var safnað fyrir Hemma- og

Pollasjóð til að auka frístundaþátttöku efnaminni barna og skiluðu 250.000 krónur sér til Hjálparstarfsins af þeim 900

miðum sem unglungarnir seldu og erum við stolt af þeim árangri og staðráðin í að gera jafnvel enn betur á næsta ári!

Með kveðju að austan, Sigríður Rún Tryggvadóttir, prestur á Seyðisfirði

Frábær stuðningur ÆSKA við börn og unglunga!

Á landsmóti Æskulýðsfélags þjóðkirkjunnar í Vestmannaeyjum í október síðastliðnum söfnuðu 700 unglingar 500 þúsund krónum í þágu jafnaldra sinna sem búa við kröpp kjör. Á aðalfundi ÆSKA þann 18. febrúar, afhenti Guðmundur Karl Einarsson, gjaldkeri, Bjarna Gíslasyni, framkvæmdastjóra Hjálparstarfsins, framlagið sem rennur í Polla- og Hemmasjóði stofnunarinnar.

Pollasjóður var stofnaður árið 2014 þegar Heiðar í Pollapönki setti Eurovisiongítarinn sinn á uppboð. Úr sjóðnum fá börn efnalítilla foreldra styrk og þar með tækifæri til að láta draum sinn rætast og stunda tónlistarnám. Hemmasjóður er nefndur eftir Hermanni Hreiðarssyni, knattspyrnumanni, sem lagði til stofnfé hans. Sjóðurinn hefur það að markmiði að styrkja börn efnalítilla foreldra og veita þeim tækifæri til að stunda íþróttir með vinum sínum og félögum.

Allt frá árinu 2010 hefur ÆSKA safnað fé til fjölmargra verkefna Hjálparstarfsins. Ungu fólkíð lætur sig sannarlega aðra varða og kann Hjálparstarfið þeim bestu þakkir fyrir stuðninginn!

„Flóttafólk er fólk og fólk kemur okkur við“

„Stuðningsfjölskyldur eru mjög mikilvægar þar sem þær hjálpa flóttfólki einna best við að aðlagast nýju samfélagi. Flóttafólk sem hingað kemur fyrir tilstilli Flóttamannahjálpar Sameinuðu þjóðanna og Rauða krossins nýttur þessarar þjónustu en þeir sem fá vernd eftir að hafa sótt um hæli hér fá hana ekki. Þessu verðum við að breyta því annars eigum við á hættu að hér verði til jaðarhópar eins og gerst hefur víða í Evrópu,“ sagði Atli Viðar Thorstenssen, sviðstjóri hjálpararsviðs Rauða krossins í erindi um stöðu og aðbúnað hælisleitenda og flóttafólks á Íslandi sem hann hélt á fundi fulltrúaráðs Hjálparstarfs kirkjunnar í Grensáskirkju þann 10. mars síðastliðinn.

Atli sagði að bæta þyrfti hælismeðferð og fræðslu til þeirra sem vinna að málefnum útlendinga. „Við þurfum fleiri sjálfbóðaliða sem eru talsmenn flóttafólks og hælisleitenda og við verðum líka að upplýsa al-



menning um málefni flóttafólks. En við þurfum líka að fræða fólk sem hingað kemur markvisst um menningu okkar og lög og reglur í samfélaginu. Við eigum ekki að vera röð við það og ekki gefa afslátt á mannréttindum, sagði Atli í erindi sínu.

Á aðalfundi fulltrúaráðs Hjálparstarfs kirkjunnar í september síðastliðnum, var rætt að ef taka ætti vel á móti flóttafólki frá Sýrlandi þyrftum við að kynna okkur bakgrunn þess, sögu, menningu og lífnaðarhætti. Við yrðum að geta sett okkur í þeirra spor. Að við yrðum að undirbúa okkur sjálf til þess að geta sem best komið til móts við fólkíð á þeirra forsendum.



Hjálparliði gefur barni gleðilegt sumar, voninni vængi og gjöf sem gefur!

Hjálparstarf kirkjunnar reiðir sig á stuðning almennings til að sinna hjálparstarfi. Ýmsar leiðir eru til, ein þeirra er að vera Hjálparliði sem styrkir verkefni Hjálparstarfsins með reglulegu framlagi. Það gerir okkur kleift að hjálpa þeim sem búa við mikla fátækt – bæði hér heima og í fátækustu ríkjum heims. Vilt þú vera Hjálparliði? Við erum að hringja í fólk þessa dagana.

Tækifæriskortin Gleðilegt sumar munu fást í matvöruverslun-



um og á bensínstöðvum fyrir og á sumardaginn fyrsta. Andvirði þeirra fer í stuðning við börn á Íslandi svo þau geti tekið þátt í tómstundum með vinum sínum. Með því að kaupa kortið sem kostar 1.200 krónur tekur þú þátt í því að gefa barni gleðilegt sumar! Listaverkin sem prýða kortin gerðu 5 ára börn á leikskólanum Austurborg í Reykjavík.

Gefum voninni vængi

Viltu taka þátt í söfnunarverkefni sem hefur um leið uppeldislegt gildi? Verkefnið heitir Tveir samstæðir söfnunarbaukar, annar merktur Sjóður fyrir náungann en hinn Sjóður fyrir mig, gefa foreldrum og fræðurum færi á að kenna börnunum annars vegar að það er skynsamlegt að safna fyrir því sem mann langar í og hins vegar um samkennd og náungakærleik; að um leið og við gefum

eigin vonum vængi sé mikilvægt að huga að náunganum.

Gjöf fyrir minimalistann

Á gjafabréfasíðunni okkar www.gjofsemgefur.is eru hátt í fimmtíu gjafabréf sem eru tilvalin tækifærisgjöf fyrir fermingarbarnið, stúdentinn, þann fimmtuga, brúðhjónin ...



Vegna þurrka í Eþíópíu eru 10 milljónir manns á barmi hungursneyðar:

Bregðumst við NÚNA!



Valgreiðsla í heimabanka

Söfnunarsími 907 2003 (2.500 krónur)

Söfnunarreikningur 0334-26-886

kt. 450670-0499



Hjálparstarf
kirkjunnar

actalliance